



Eth grop d'Unitat d'Aran- PM- PSC, ara empara de çò que dispausa er article 97.3 en relacion damb er article 91.4 deth Reiau Decrèt 2568/86 de 28 de noveme, Reglament d'Organiazacion e Foncionament de Regim Juridic des Entitats Locaus, presente ath Plen deth Conselh Generau d'Aran.

PREPAUSA D'ACÒRD PLEN: APROBACION, SE PROCEDÍS, DERA MOCION A FAVOR DETH DRET A DECIDIR DETH PÒBLE ARANÉS

Prumèr.- Aprovar era Mocion deth Conselh Generau d'Aran en favor deth dret a decidir deth pòble aranés, damb eth redactat que seguís:

MOCION EN FAVOR DETH DRET A DECIDIR DETH PÒBLE ARANÉS

Dauant es darrèri eveniments que, en tot auer coma simbèu era manifestacion der 11 de seteme de 2012, mèrquen un punt d'inflexion ena relacion de Catalonha damb era rèsta d'Espanha,


Dauant dera convocatòria anticipada d'eleccions tath Parlament entath dia 25 de noveme,

Dauant qu'eth Parlament acabe d'aprovar, eth dia 27 de seteme, ua resolucion entà qu'eth pòble de Catalonha pogue decidir liurament e democraticament eth sòn futur collectiu, en tot instar ath Govèrn a convocar ua consulta prioritàriament laguens dera pròplèu legislatura,

Ei pr'amor d'aguestes rasons qu'eth grop d'UA-PM-PSC en Conselh Generau d'Aran propòse ath Plen era adopcion des acòrds que seguissen:

1. Que, en aquest procès, es institucions catalanes tenguen en compde era veu pròpria d'Aran coma pòble diferenciat e territòri istoric que, a despièch deth sòn plaçament nòrd enlà deth Pirenèu, a pactat ath long des sègles era sua liura ligason damb era Corona d'Aragon, eth Principat de Catalonha e eth Regne d'Espanha, en tot preservar enquiara actualitat, per miei der Estatut d'Autonomia de Catalonha de 2006 e era Lei de regim especiau de 1990, era sua autonomia entà ordenar e gestionar es ahèrs publics deth sòn territòri e era especificitat dera sua organizacion institucionau e administrativa (article 94 der EAC), qu'a hèt possibla era gestion mès immediata d'aqueres atribucions qu'afècten dirèctament es interèssi des aranesi e es araneses.

2. Que, se Catalonha encète un nau camin nacionau, era Val d'Aran, "entitat territoriala singulara laguens de Catalonha" e "realitat occitana dotada d'identitat culturau, istorica, geografica e lingüistica, defenduda pes aranesi ath long des sègles", d'acòrd damb era definicion der article 11 der EAC, pogue tanben daurir ua naua etapa a favor deth sòn estatus especiau entà garantir eth progrès sociau, eth desvolopament economic, eth refortiment democratic e eth foment dera cultura e era lengua pròpies.
3. Que, per tant, eth pòble aranés, coma subjècte politic e comunautat damb caractèr nacionau, damb cultura, lengua e institucions pròpies, damb ua singularitat e ua identitat especificas e pluraus e, sustot, damb ua voluntat compartida de projectar eth sòn autogovèrn de cap tath futur ath servici deth progrès e eth benèster des sòns ciutadans, pogue exercir tanben eth dret a decidir eth sòn futur collectiu de forma liura, democratica e pactada.
4. Qu'aguesti acòrds se hèsquen a arribar as institucions deth Conselh Generau d'Aran, es Ajuntaments dera Val d'Aran, eth Govèrn dera Generalitat e eth Parlament de Catalonha.



Francés X. Boya
Portaveu deth Grop UNITAT D'ARAN

Val d'Aran, 17 d'Octobre de 2012